

ROMAFŌ Paulo Ovoli Kĩ Etsɛle Ema Romafo

^I Ovoli kīi to yī, Paulo, Yesu Kristo ɔsumunɛ sɛkɛ̃. Baguma lɛpau yī, ɛvɛ yī kī iɣadani ye fɔto ɔnyanɛ, ndɛ letsã nɛ ye Kale Wī a akū.

^{II} Baguma lɛ Kale Wī kīi eyi anɛ kɔkɔɛ ɛtsãmena ye onukpɛ̃ banyɛnɛ akū, ndɛ ayekī bɛtsɛle nɛ Katsɛle Kpalɛwa a kamɛ a. ^{III} Bɛlɛ Kale Wī kīi nɛ Obi, boɛ ɔlate Yesu Kristo akū. Bɛma ye ndɛ otidziwa aye nɛ Lɛgã Dawid kasinu a kamɛ. ^{IV} Nɛ kakpalɛ nɛ hũhũ kamɛ ni, Baguma nyɛ ye ɛtsa mɔ kɔbɛ̃ ndɛ ye obi, lɔkɔ a kī ɛdzɛla ye etomɛna wuda kamɛ a. ^V Baguma tsã Yesu Kristo akū ɛmó boɛ kɔnya bɔyadani fɔto banyanɛ, ayekī fɔatsã ye dī akū, bɔakpã fudɛ fudɛ bati flɛɛ bɛtɛ ye bido, bitse ye. ^{VI} Mi Romafo lɛmɛ, midɛi nɛ bati a kī Baguma vɛ kī bɛyaakɛna Yesu Kristo bade a kamɛ.

^{VII} Ade fɔesũ ntsɛle ovoli kīi mama mi flɛɛ a kī midɛi nɛ Roma, kī Baguma awɛ mi kalɛ, ade ɛvɛ mi kī miyaakɛna bati kī ɛkpalɛ bɛ akū a.

Baguma boɛ ɔlɛga mɔ boɛ ɔlate Yesu Kristo, bɛmɔ mi kɔnya, bɛkpa mi lukudɔ lɛmɛ!

Paulo Nyɛ Baguma Kɔlɛ.

^{VIII} Letsa a kī lɛnyaa lɔto nyɛ kī, nkɔa Yesu Kristo manyɛ yī Baguma kɔlɛ nɛ mi flɛɛ lɔlɔ, kitɔnɛkī balɛ ayekī mite Kristo mido a fɔletsã nɛ katinya kamɛ flɛɛ. ^{IX} Baguma a kī masum mɔ yī

owole flee, ne letsã a kĩ made ne ye Obi Kale Wĩ a akũ a, nye yĩ adansie kĩ letsa a kĩ male a nye onokwali. Baguma nyina kĩ mate ane ne mi akũ, ^X loko nye loko kĩ maboa mpaε. Mawã Baguma kĩ nte fonye ye kawε ni, ekpa yĩ osi ãyaasela mi finyaa.

^{XI} Kitonekĩ mawε mo osĩ mo osĩ kĩ bomo akũ, loko nkwa hũhũ kame futetsa fudi mma mi nkwa ndo mi kobẽ. ^{XII} Letsa a kĩ matsa nye kĩ bomo mi bóado akũ kobẽ. Yĩ katekado ado mi kobẽ, ade mi kade lemε aado yĩ kobẽ a.

^{XIII} Nwaẽ amε, mawε kĩ minyi kĩ nkena nhihie loko pii kĩ mayaasela mi kufe, lemε loko nye loko litsedi asua yĩ osi. Mawε kĩ mana bati kĩ betε Kristo bido ne mi kame, nde ayekĩ nna ne bati bebã a kĩ benyε Yudafo a kame a. ^{XIV} Kitonekĩ yĩ adzuma foane kĩ nde letsã nkpa bati flee, bikĩ binyina kadi mo bikĩ binyina kadi, bati kĩ binyina tuvoli mo bikĩ binyina tuvoli. ^{XV} Ade foesũ akũ asĩ yĩ kĩ made letsã ne Kale Wĩ a akũ nkpa mi a kĩ mideĩ ne Roma lemε a.

Kale Wĩ a Deĩ Kobẽ.

^{XVI} Kale Wĩ a láko yĩ konyɔã, kitonekĩ Baguma kobẽ koane. Kakpa bati a kĩ betε ke bido a nkpa, Yudafo nyaa loto fomoko bikĩ benyε Yudafo a. ^{XVII} Kitonekĩ Kale Wĩ a kame banye ayekĩ Baguma abu bati kĩ bekpola a katsa. Fonye katekado foletsa kito kayokayi kenawo kawũna. Nde ayekĩ betsele ne Katsεle Kpalewa a kame kĩ, “Oti kĩ Baguma abu kĩ yadã kpĩ ne ye katekado sũ ni, yaana nkpa.”

Odima Lenyε Oti Kpĩ Ne Baguma Ane.

XVIII Baguma anye ye kalokpa katomena ode kako ne bati a kī bakɔa tokpa mɔ ablo fɔtsa kasua ɔnokɔali a kanyi osi a akū. **XIX** Baguma avele bati a sɔto kitonekī binyina fɔtsa a kī otidziwa aapuli enyi ne ye akū a. Baguma mɔawe a lenye foe etsa be yededeede. **XX** Kito ane kī Baguma boa katinya a, ye kutitse kī baámɔ mɔ ane a, mɔ kobě kī kudeĩ daa mɔ ye Baguma kutidu a, anye foe akū katsa ne fɔtsa a kī ebɔa a kame. Foesū bati a leláapuli benye onukpě kī binyína Baguma.

XXI Tito kī binyina Baguma malo ni, baákpa ye obu a kī efeta ye, ade baánye ye kole a. Mbom fɔtsa a kī folá nfaso akū bakona, ade be adzuni kame ke otū a. **XXII** Babu be akū kī binyina kadi, leme bedani badzimbifo. **XXIII** Ne kī bekɔa obu bekpa Baguma a kī edzi nkpā daa a ni, basum fɔtsa a kī bemε mɔ awe kutidu, kī folá nde oti kī yaku, iye kovolabi, iye bayaε, iye bayaε kī baboli ne seme akū.

XXIV Ne foesū Baguma fone be awe kī bekena effī fɔtsa kī be towole awe a, kī bekɔa be sukena bakena fonyɔãtsa mɔ be akū akū. **XXV** Bakɔa Baguma akū ɔnokɔali a kavemena mɔ fɔvã. Basum fɔtsa a kī Baguma boa a kaba Baguma mɔawe a kī ebɔa foe a, kī kefeta kī bekaamu daa a! Fɔya lomɔ.

XXVI Ne fukī bakena a sū, Baguma fone be awe ekpa sukena fowetsa kī fɔado akū konyɔã kakena. Be batsole dani bawamɔ bakɔba batsole. **XXVII** Ade ayea banyole leme fɔ bemɔ batsole kawa nde ayekī Baguma kena eyi a, mbom bakɔba banyole ako be odo. Foesū banyole awamɔ akū kī konyɔã leláa foe kame. Ne obla

kpa kī beb̄a kī sū ni, Baguma vele be soto a kī sefeta be a, ne be moawe kame.

XXVIII Ayekī bati a sī kī baáte kadikanyi wī ne Baguma akū a bido ne be kame sū ni, Baguma fone be awe ekpa be adzuni kī bibula kade a, kī bekena fotsa a kī fotáfeta a. **XXIX** Be kame yi mo tokpa tidi nye tidi kakena, ablo, anengbā mo bati tokpa kawε. Fobebā kī fudeī ne be kame nye lineke kanɔ, awudi, lema kavū, bati kake mo likesī. Fukī fubu nye kī bale bati akū kodzela, **XXX** benye bati buī banyene, mo Baguma bakesīne. Benye bati bavūnane, akū batane, akū bapiane, bawe tokpa tisi bebā pii kayamena mo bati kī baábu be bamane a. **XXXI** Benye bati kī be towole láko be koto, baákena ne bohe a akū a, belá seme kale ade baámɔ oti konya a. **XXXII** Titɔ kī binyina pefee kī ne Baguma mbla a onukpē ni, bikī bidzi nkpā ne osi kī odu akū a feta bekpa wuda malo ni, bekakena foe. Nné foe odi bakena, mbom bedza ne bikī bakena fotsa kpa kī odu a liti.

II

Baguma Adzemo Bati Flee.

^I Nwaē, no ako bati bebā koto? Nte litsa oti ane malo oláapuli onye onukpē kī no kō oti kpī ane. Kitonekī nte adzemo bati bebā adeke akena letsa moape a kī de bakena a ni, no moawe akū ako koto. ^{II} Bunyina kī Baguma deī otobe nte edzemo bati a kī bakena fotsa kī bame a. ^{III} Leme nwaē, no a kī akena fotsa kī bame a leme ako bati bebā koto ne foe akū a ni, abu kī aapuli olo Baguma kotokako? ^{IV} Mbɔεε obɔε foe kī Baguma deī

seme kale, owole kado mo owole boee sũ otséla letsama? Onyina kĩ nuwĩ Baguma deĩ seme kale, kitonekĩ yawe kĩ yakpã no odani owole kame.

V Leme ne no ato osĩ kĩ aádani owole kame sũ ni, ofõ no soto kavele aana osẽ ne luwi a kĩ Baguma aanye ye kalokpa mo ye foletsa kadze kpĩ akũ a kanya. **VI** Kitonekĩ Baguma aase odi nye odi koto ne ye adzuma a kĩ ekena a onukpẽ. **VII** Bati a kĩ bakena tuwĩ kĩ bawe kukũkpale, obu mo daa nkpã a, Baguma aakpa be nkpã kĩ elá kawũna a. **VIII** Leme bati bebã a kĩ be odi fude bawe, kĩ bisĩ onokwali a, bitomo tokpa a, Baguma aakoa kalokpa ewele be soto mo osĩ mo osĩ. **IX** Bati flee a kĩ bakena tokpa a, aamo lubo mo kaloe, Yudafõ aanya loto, ke liti bikĩ benyé Yudafõ a leme. **X** Leme Baguma aakpa bikĩ bakena tuwĩ a kukũkpale, obu mo lukudo, Yudafõ aanya loto bena, fomõ bikĩ benyé Yudafõ a leme. **XI** Kitonekĩ Baguma ládã oti ane ne ye foletsa kadze kame.

XII Bikĩ benyé Yudafõ a tána Mose mbla a, leme kĩ bekena titikpa ni, Baguma aavele be soto, kĩ eláakoa mbla a bedzemõ be. Yudafõ a na Mose mbla a, leme bekena titikpa, Baguma aakoa mbla a edze mo be. **XIII** Kitonekĩ nné bati a kĩ batse mbla a nye bati kpĩ ne Baguma ane, mbom bati a kĩ bekena ne mbla akũ a, adã kpĩ. **XIV** Ne onokwali kame ni, bikĩ benyé Yudafõ a tána mbla a, leme nte oti kaboa kame fõ bekena letsa a kĩ Mose mbla tsa ni, foatsa kĩ bekena mbla bekpa be akũ, tito kĩ belá Mose mbla a malo. **XV** Be fokelatsa atsa kĩ Baguma tsele mbla a ne be towole kame. Be towole leme atsa kĩ fonye onokwali, kitonekĩ fokõ fudi be towole ako be koto

ade yadza ne be liti a. ^{XVI} Ne foesũ ne Kale Wĩ a kĩ male a onukpẽ ni, ade aye fõana ne Luwi a akũ kĩ Baguma aatsã Yesu Kristo akũ edzemõ bati flee fõlo kame fõletsa kolawa a.

Letsa a Kĩ Mose Mbla a Le Ne Yudafõ Akũ.

^{XVII} Ave nõ akũ kĩ Yudani, akõa ane kate ne mbla akũ, ade apia ne Baguma akũ a. ^{XVIII} Onyina letsa a kĩ Baguma awe kĩ kena, ade okõle otomena mbla a kame letsa a kĩ lenye fõtsa wĩ a. ^{XIX} Ate kado kĩ onye banekune okpãne, onye ohaĩ okpa bikĩ bideĩ ne otũ kame a. ^{XX} Okõa nõ akũ okena bakõasia õvelene nõ bikĩ betábo ane tõ fõtsa õtsane. Onyina yededeede leme kĩ kadikanyi nõ onokõali deĩ ne mbla a kame. ^{XXI} Nõ a kĩ atsa bati bebã fõtsa a, nde sũ aátsa nõ mõawe akũ? Ade letsã kĩ bati betaye, leme nõ mõawe a aáye? ^{XXII} Abi bati kĩ betabõa adõpaa, leme nõ mõawe a aábõa adõpaa? Aáwe baviõ fõletsa, leme aáye kuviõla kame fõtsa? ^{XXIII} Abo õwõle ne Baguma mbla a akũ, leme afum ye mbla a kakõado Baguma konyõã. ^{XXIV} Katsese Kpalawa a le kĩ, “Mi Yudafõ õbla kpa sũ bikĩ benyẽ Yudafõ a ale fõletsa kpa ne Baguma dĩ akũ.”

^{XXV} Nte akena ne mbla a akũ ni, kekõ nõ lekpati katsua a akũ deĩ nfasõ, leme nte aákena ne mbla a akũ kõ ni, oketimo bikĩ betátsua fõkpati a. ^{XXVI} Nte oti kĩ enyẽ Yudani, kĩ etátsua lekpati akena ne mbla a akũ ni, Baguma leláabu ye nde oti kĩ etsua lekpati aye?

^{XXVII} Foesũ, mi Yudafõ, oti kĩ enyẽ Yudani a kĩ ekena ne mbla a akũ aako mi kõtõ, kitonekĩ miafum mbla a, tito kĩ betsele ye biyi bekpa mi,

ade miatsua lekpati a. ^{XXVIII} Nné oti kī bema Yudani ñye oti kī bitsua lekpati ne Mose mbla a onukpē nye Yudani. Ade lekpati katsua paa ni, fɔdzé fɔkpa sukena katsua lekenana kī bamɔ ne oti akū a, ^{XXIX} mbom Yudani kpanunuunu nye oti kī enye Yudani ne ye kamekame, ade foe nye kī bitsua ye ɔwɔle kame lekpati. Lekpati katsua kīi nye Baguma Hūhū adzuma, fɔtáto mbla a kī betsele biyi a kame. Baguma amu oti kīi odu, nné batidziwa.

III

^I Litsa koū Yudani deī ebē oti kī enyé Yudani, ñye litsa nfaso deī ne lekpati katsua kame?

^{II} Ɔnɔkɔali nfaso a pɔne ne tisi pii akū. Katɔnyade nye kī Yudafo awe Baguma kɔa ye fɔlets a edo.

^{III} Leme nde nte be kame badi táte bido a? Katsa fɔatsa kī be katatekado aafɔ Baguma leláadi ɔnɔkɔali? ^{IV} Oowo! Kene kī Baguma adi ɔnɔkɔali, tito kī oti nye oti ama fɔvā malo, nde ayekī Katsela Kpalewa a le kī,

“Nte ɔle kɔdzela ni, no fɔlets a fonya ɔnɔkɔali.

Nte bedzemo no ni, aanya akū.”

^V Leme nte boe titikpa kakena anye fɔtsa wī a kī Baguma akena a katsa yededeede a ni, bóapuli bóle kī Baguma akena tokpa nte evele boe soto? Ade kavia kī otidziwa aavia a. ^{VI} Oowo! Nte Baguma ládã kpīi ni, nde yaakena edzemo katinya kame? ^{VII} Nte yī fɔvā kama anye Baguma ɔnɔkɔali a katsa, kī bamu ye a, nde sū bako yī kɔto nde tokpa ɔkenane? ^{VIII} Nde sū boále kī, “Mifɔ bokena titikpa ayekī tuwī aane tito foe kame?” Ɔnɔkɔali bati badi lamena fɔvā kama

kate ne yĩ akũ kĩ ade aye nle a. Baguma aako be koto nde ayekĩ kefeta.

Odima Lenyé Oti Kpĩ.

IX Mbɔɛɛ finyaa, boe Yudafɔ kadzi kame nene kebẽ bikĩ benye Yudafɔ a? Oowo! Kitonekĩ ĩnya lotɔ ntsa kɔkɔɛ kĩ tɔkpa nya Yudafɔ mo bikĩ benyé Yudafɔ a flee akũ, **X** nde ayekĩ Katsɛle Kpalɛwa a le kĩ,

“Oti odima leláa kĩ yadã kpĩ. Midi oti moape malo leláa.

XI Odima leláa kĩ yanu foletsɔ kayɔ,
ĩye kĩ yawɛ Baguma liti osi.

XII Bati flee muniki ne Baguma liti,
be flee beyɛla osi,
ade odima leláa kĩ yakena tuwĩ a,
oti moape malo leláa.

XIII Be tudomɛna binya tɛwaa
nde linike kĩ lɛwaa luto aye,
bake bati menɛmɛnɛ mo be fɔmɛ.
Be onukpɛ kame foletsɔ la nde kɔɛ kadɔ aye.

XIV Fudumutsa mo folɔwotsa yi be tunukpɛ
kame.

XV Bawe sɔwa kĩ bapila bati beko be.

XVI Kako nye kako kĩ banaa ni, kawɔla mo
fotsa kade kabula ate ne liti.

XVII Binyĩna kadzi ne lukudo kame,

XVIII ade Baguma kavila kadima leláa be
kame a.”

XIX Finyaa, bunyina kĩ letsɔ nye letsɔ ne mbla
a kame a atamo bikĩ bideĩ ne mbla a kayɔ,
ayekĩ baasua batidziwa onukpɛ kanye osi, lokɔa
Baguma ledzemɔ katinya kame flee. **XX** Kitonekĩ
odima lenyé oti kpĩ ne Baguma anɛ, ne ayekĩ

yakena ne mbla a akũ sũ. Letsa a kĩ mbla a akena nye kĩ yafõ oti anyi kĩ ekena tokpa.

Letsa a Kĩ Lefõ Bòkpòla Ne Baguma Anẹ.

XXI Leme finyaa, benye osi a kĩ Baguma atsã kakena bati kpĩ ne ye ane a betsa. Fukĩ letséla mbla a akũ, tito kĩ Mose mbla a mo Baguma onukpẽ banyene di foe akũ adansie malo. **XXII** Baguma akena bati badã kpĩ katsãmena be Yesu Kristo katekado kame. Yakena fukĩ kakpa bati a kĩ bete Kristo bido a flee, kĩ ntsitsemu adima lelãa foe kame. **XXIII** Kitonekĩ odi nye odi kena tokpa, ade edeĩ mo lugo ne Baguma kukũkpale a owẽ a.

XXIV Leme ne konya a kĩ Baguma amo faa sũ ni, etsã Kristo Yesu a kĩ ese koto ne boe lolò a akũ, ekena boe bati kpĩ. **XXV** Baguma kɔa ye ekpa nde lema okplane kĩ fotsã ye wuda kame bati bena tokpa kakoakate nte bete ye bido. Baguma kena fukĩ enee yatsa kĩ yadã kpĩ. Ne kòkòe a, Baguma na owòle bɔee, eve sinepo esua bati tokpa, **XXVI** leme finyaa kɔ yate ane ne be tokpa akũ ekɔa yatsa kĩ yadã kpĩ. Ne osi kũ akũ, Baguma atsa kĩ ye moawe enye oti kpĩ ade yakena odi nye odi kĩ ete Yesu edo oti kpĩ a.

XXVII Finyaa ni, litsa bóakɔa bubo owòle? Bolá letsamama! Mo litsa sũ? Ayekĩ bɔakena ne mbla a akũ sũ mbɔee? Oowo! Mbom ayekĩ bote budo sũ. **XXVIII** Foesũ bóawũna kĩ katekado odi akũ fotsã mo oti adã kpĩ ne Baguma ane, kĩ nné mbla a akũ kakena sũ. **XXIX** Mbɔee Baguma a ni, Yudafò odi ode yanẹ? Nné bikĩ benyé Yudafò a leme Baguma yanẹ? Oo, be malo Baguma yanẹ!

XXX Baguma mɔape deĩ, ade yaakena Yudafo bati kpĩ etsãmena be katekado akũ a, ekena bikĩ benyé Yudafo a leme bati kpĩ etsãmena be katekado kame. XXXI Katsa foatsa kĩ katekado sũ bɔfɔne mbla a awe? Oowo! Fɔlá lomo kɔlaa, mbom bupini mbla a mo ɔsĩ mo ɔsĩ.

IV

Abraham Kadzi Kpĩ Nye Katekado Nfaso Ketsa.

^I Litsa bóapuli bóle ne boe kade ɔwanyo Abraham akũ? Litsa emó eyi ɔsũ ne fɔletsã kĩ akũ?

^{II} Nte tudzuma a kĩ ekena a akũ fɔtsã sũ Baguma bu Abraham kĩ enye oti kpĩ ni, kekõ yaana litsedi kĩ yakɔa ebo ɔwɔle, leme nné ne Baguma ane.

^{III} Kitonekĩ Katsɛle Kpalewa a le kĩ, “Abraham te Baguma edo, ade ne ye katekado sũ Baguma te ye kĩ yadã kpĩ.”

^{IV} Oti kĩ yakena adzuma ni, base ye koto, leme baábu kɔtokase a nde futetsa, mbom fonye letsã a kĩ fɔfeta fɔkpa ye adzuma a kĩ ekena a. ^V Leme nte odi táte dĩ ne adzuma kakena kame, mo ete edo kĩ Baguma akena bikĩ baávila ye bati kpĩ ni, ne ye katekado sũ Baguma aabu ye kĩ enye oti kpĩ. ^{VI} Ade foe Legã Dawid leme le kĩ bihila oti a kĩ Baguma bu ye kĩ enye oti kpĩ, kĩ nné ye adzuma wĩ a kĩ ekena a sũ. Dawid le kĩ,

^{VII} “Baguma hila bikĩ ye mɔawe
ekɔa be tokpa ete be a,
bikĩ ekɔa be titikpa ekɔla.

^{VIII} Baguma hila oti a
kĩ Baguma nye ane ne ye tokpa akũ.”

IX Nhila fọletsa a kī Dawid le ne awī a ni, bikī bitsua fọkpati a odi fude yanε, mbọεε kī mọ bikī betátsua fọkpati a? Oowo! Enye bikī betátsua fọkpati a lemε ade, kitonekī bọle butomena Katsεε Kpalεwa a kame kī, “Ne Abraham katekado sū, Baguma bu ye oti kpīī.” X Lọkọ lowodabe Baguma bu ye oti kpīī? Ne lọkọ a kī bitsua Abraham lekpati a, mbọεε lọkọ a kī betátsua de tō a? Fonye lọkọ a kī etátsua tō lekpati a, nné lọkọ a kī etsua liti a. XI Ke liti kọlaa fọmọ bitsua Abraham lekpati. Ye lekpati katsua lemε nye nsentseleni kī Baguma te ye kī enye oti kpīī ne ye katekado sū, tito kī ne lọkọ a na kame malo betátsua tō ye lekpati. Foesū Abraham yadani bati a kī betε Baguma bido a flee hūhū kame ọlega. Tito kī betátsua fọkpati malo ni, betε be ndε bati kpīī. XII Ade ayea Abraham nye bikī bitsua fọkpati a lemε ọlega a. Lemε nné ne ayekī bitsua be fọkpati a odi sū, mbom ne ayekī bidzi nkpā ne katekado kame ndε ayekī boe ọlega Abraham dzi fọmọ bitsua ye lekpati a sū.

Baguma Kpa Abraham Bọhe.

XIII Baguma kpa Abraham mọ ye kasinu kame babi bọhe kī katinya kīī kame aanya be adzapadiε. Ekena foe nné ne ayekī Abraham kena ne mbla a akū sū, mbom ne ayekī etε edo kī Baguma bu ye oti kpīī sū. XIV Kitonekī nte bikī bakena ne mbla a akū odi aanya fọtsa a kī εle eyi a ni, kekō katekado lenyé letsama ade Baguma kalekayi a lemε nye fọtsa pupulidza a. XV Mbla a avele Baguma kalokpa kayamena, lemε awā kī mbla leláa ni, mbla kafum leláa.

XVI Foesũ bõhe a dzẽ ne katekado akũ, ayekĩ bõhe a aatim nde fotsa a kĩ Baguma mọ konya ekọa ete Abraham kasinu a kame babi. Nnέ bikĩ bakena ne mbla a akũ odi fowaa fọkpa, mbom mọ bikĩ bete bido nde ayekĩ Abraham te edo a, kitonekĩ Abraham nye boe flee hũhũ kame ọlega, **XVII** nde ayekĩ Katsese Kpalewa a le kĩ, “Nkọa nọ nkena fude fude pii ọlega.” Foesũ bõhe a nene ne Baguma ane. Ade ye nye Baguma a kĩ Abraham te edo kĩ yadzela banokpa bayidza kadzi nkpā, kĩ yafõ fotsa a kĩ foláa kọkọe fọane katinya.

XVIII Titọ kĩ ane kate adima buki eláa malo ni, Abraham te edo ekadā ane, ade foesũ ekena fude pii ọlega, nde ayekĩ Baguma bi ye a kĩ, “Nọ babi mọ bawa aama besa beblebee nde fusibii aye.” **XIX** Ne loko a, Abraham te nde futeli ọha, leme ye katekado onukpẽ tádo, titọ kĩ emọ eyi ọsũ kĩ kọbẽ woli ne ye sukena kame, mọ ayekĩ Sara leme tẽ kọma kana malo a. **XX** Etáte fotsa a kĩ Baguma le eyi kĩ yaakena ekpa ye a akũ atsindze, ade etáfone ye katekado awe a, mbom ye katekado a do ye kọbẽ, edo Baguma obu. **XXI** Ete edo pipiipi kĩ Baguma aapuli ekena ne letsa a kĩ ele eyi a akũ. **XXII** Ade Abraham katekado sũ mọ Baguma bu ye kĩ enye oti kpĩ a. **XXIII** Fọletsa a kĩ bele kĩ, “Baguma bu ye kĩ yadā kpĩ” a, nnέ Abraham odi sũ betsele foe, **XXIV** mbom betsele foe bekpā boe leme. Boe a kĩ bóate oti a kĩ edzela boe Ọlate Yesu etomena kanokpa a budo a, baabu boe kĩ bonye bati kpĩ. **XXV** Boe titikpa sũ Baguma fone Kristo awe ekpa kĩ beko, ade edzela ye edzi nkpā, ayekĩ yaabu boe bati kpĩ.

V

Baguma Bu Boe Bati Kpĩ.

^I Finyaa, kĩ Baguma bu boe bati kpĩ ne boe katekado sũ ni, bõtsê boe ɔlate Yesu Kristo akũ bõna lukudo ne bõmo Baguma kayite. ^{II} Ye akũ leme bõtsã mo osi binya ekpa boe kĩ Baguma aamo boe konya, budzi ne ye konyakamo a kame. Ne foesũ bõapia ne kõnete a kĩ budeĩ kĩ bõana tsefã ne Baguma kukũkpale a kame. ^{III} Ne ɔhau pii kame malo bõamo kawõle, kitonekĩ bunyina kĩ ɔhau afõ bõakõle ɔwõle kado, ^{IV} ɔwõle kado afõ bõadza pintii, ade kadza pintii afõ bõana kõnete a. ^V Ade kõnete lãfõ kõnyõã awo boe, kitonekĩ Baguma kõa ye ɔdo edo ne boe tawõle kame etsãmena ye Hũhũ Kpalewa a kĩ ekpa boe a akũ.

^{VI} Kitonekĩ kĩ bubuki bolá kõbẽ kudima a, ade loko a na kame Kristo ku ne tokpa bakenane lolo, nde ayekĩ Baguma moawe yi ekpa a. ^{VII} Fõnye letsa mo ɔsĩ kĩ oti odi aku ne oti kpĩ lolo. Fõapuli fõya malo kĩ oti odi aado ɔwõle kĩ yaku ne oti wĩ lolo. ^{VIII} Leme Baguma tsa boe ayekĩ eti yawe boe kale, kitonekĩ loko a kĩ bubuki bõnye tokpa bakenane a, Kristo ku ne boe lolo.

^{IX} Etsã ye wuda kame ekena bati boe kpĩ ne Baguma ane. Wuda kĩ sũ yaanye boe etomena Baguma kalokpa a kame. ^X Bõnya Baguma bakesĩne leme ekena boe ye bakõba etsãmena ye Obi wuda a kĩ ekõa epata ye a kame. Finyaa kĩ ekpõla Baguma ekpa boe kĩ ni, yaate boe eba, kitonekĩ edzi nkpã. ^{XI} Leme nné fukĩ odi, mbom bõamo kawõle ne letsa a kĩ Baguma tsã boe ɔlate Yesu Kristo akũ elõla bõmo ye kayite a sũ.

Ntsitsemu a Kĩ Edeĩ Ne Adam Mŏ Kristo Kayite a.

XII Tŏkpa tsã oti mŏa akũ teya ne katinya kame, ade wuda tsã ye akũ eya a. Ne fukĩ sũ ni, wuda yale ewo ne batidziwa flee kame, kitonekĩ odi nye odi kena tŏkpa. **XIII** Ne ɔnokɔali kame ni, tŏkpa na ne katinya kame fomɔ mbla a ya, leme awã kĩ mbla leláa ni, baábu letsama kĩ lenye tŏkpa. **XIV** Leme kito Adam loko keyawo Mose loko a ni, wuda nya batidziwa flee akũ, mŏ bikĩ betákena tŏkpa nde tikĩ Adam kena a malo. Adam kĩ dzẽ nde oti a kĩ yaaya a.

XV Leme be bati nviã a betáketi, kitonekĩ Baguma futetsa faa a lelá nde Adam tŏkpa a. Fonye ɔnokɔali kĩ bati pii ku ne oti mŏa tŏkpa sũ. Leme Baguma konyakamŏ bẽ kŏlaa, foesũ ade ayea ye futetsa a kĩ yakpa bati pii faa katsãmena oti mŏa kĩ enye Yesu Kristo akũ a la a. **XVI** Futesa a kĩ Baguma kpa faa a lelá nde letsa a kĩ oti mŏa tŏkpa vele teyamena a, kitonekĩ tŏkpa a kĩ oti mŏa a kena a yamŏ kadze mŏ kŏtŏkaku. Leme futetsa a kĩ Baguma kpa faa a fõ bibu bati beblebee tŏkpa a kĩ bekena a kĩ badã kpĩ. **XVII** Fonye ɔnokɔali kĩ oti mŏa tŏkpa a kĩ ekena sũ wuda yaanya akũ. Leme letsa a kĩ oti mŏa a kĩ enye Yesu Kristo kena a bẽ foe flee. Bikĩ bena Baguma konyakamŏ baũ kĩ flee a, kĩ ekena be bati kpĩ leme a, aanya akũ ne nkpã kame betsãmena Kristo akũ.

XVIII Foesũ nde ayekĩ oti mŏa tŏkpa a kĩ ekena fõ beko batidziwa flee kŏtŏ a, ade ayea oti mŏa tuwĩ kĩ ekena a kpa batidziwa flee ɔtŏbe, bena nkpã leme a. **XIX** Ade nde ayekĩ oti mŏa atŏ ɔsĩ kakena

fŃ bati flee dani tŃkpa bakenane a ni, ade ayea oti mŃa Baguma ɔledo akũ kakena aafŃ bekena bati pii kpĩĩ ne Baguma ane a.

^{XX} Beyamena mbla a ayekĩ tŃkpa kakena aapo ebu, leme awã kĩ tŃkpa kakena pŃne ni, Baguma kŃnyakamŃ leme apo kabu. ^{XXI} Foesũ ayekĩ tŃkpa nya akũ ne wuda kame a ni, ade ayea Baguma kŃnyakamŃ anya akũ katsãmena kadzi kpĩĩ kame, kakpã boe kawomena nkpã a kĩ kelã kawũna a kame, ne boe ɔlate Yesu Křisto dĩ akũ a.

VI

Budzi Nkpã Ne Křisto Sũ.

^I Foesũ, finyaa litsa bŃale? BŃana ne tŃkpa kakena kame ayekĩ Baguma kŃnyakamŃ aapo kibu mbŃee? ^{II} Oowo! Kĩ buku bŃkpa tŃkpa kŃkŃe a, nde bŃabuki budzi nkpã bŃkakena tŃkpa? ^{III} MbŃee minyina kĩ, kĩ bewŃla boe mui, bŃkena ŃmŃa mŃ Yesu Křisto a, bewŃla boe mui bŃkena ŃmŃa mŃ ye wuda a leme? ^{IV} Ne boe mui kawŃla kĩĩ kame a, bŃna tsefã ne ye wuda a kame, ade bibila bŃmŃ ye a. Nde ayekĩ ɔlega a tsã ye kukũkpale kŃbẽ kame edzela Křisto etomena banŃkpa kame a, ade aye boe malo bŃayidza budzi nkpã vŃẽ a.

^V Kitonekĩ ayekĩ bŃkena ŃmŃa mŃ ye ne ye wuda kame a, ade ayea bŃabuki bŃkena ŃmŃa mŃ ye ne boe kadzela kadzi nkpã kame nde ayekĩ bedzela ye a. ^{VI} Bunyina kĩ, kĩ bebŃa boe kutitse kŃe a ne asendua akũ mŃ Křisto ayekĩ boe sukena kĩ sawe tŃkpa kakena a aawŃ, ayekĩ bolãabuki

bonya ɬɔkpa basate. ^{VII} Kitonekĩ nte oti sila eku ni, benye ye ne ɬɔkpa kɔbẽ kayo.

^{VIII} Nte buku mo Kristo ni, bote budo kĩ bɔadzi nkpã leme mo ye. ^{IX} Bunyina kĩ, kĩ Baguma dzela Kristo etomena kanɔkpa sũ ni, eláabuki eku da. Wuda buki leláabuki ena kɔbẽ kudima ne ye akũ. ^X Wuda a kĩ Kristo ku a, eku ye deedimɔape ekpa ɬɔkpa, leme nkpã a kĩ edzi finyaa, edzi ye ekpa Baguma. ^{XI} Ade ayea mi malo mibu mi akũ kĩ miku mikpa ɬɔkpa, leme Baguma ne ɔmoa kakena mo Kristo Yesu kame.

^{XII} Ketáne kĩ ɬɔkpa tibuki tenya mi sukena a kĩ saku a akũ, ayekĩ miakakena ne se fowetsa akũ. ^{XIII} Mitafone mi sukena kakoma awe mikpa ɬɔkpa tekɔa tekena ablo adima, mbom mikɔa mi akũ mikpa Baguma nde bati kĩ enye etomena wuda kame eyamena ne nkpã kame. Mifone mi akũ flee awe mikpa Baguma fonya fotsa kĩ yaakɔa ekena tuwĩ. ^{XIV} Ketáne kĩ ɬɔkpa tenya mi akũ, kitonekĩ miláa mbla kayo, mbom mideĩ ne Baguma kɔnyakamo kayo.

Tuwĩ Kakena Basate Miane.

^{XV} Foesũ litsa boale? Bɔakena ɬɔkpa kitonekĩ boláa mbla kayo, mbom budeĩ ne Baguma kɔnyakamo kayo sũ? Oowo! ^{XVI} Minyina pefee kĩ nte mikɔa mi akũ mikena odi basumune ni, minye ɔlate a kĩ ye kayo mideĩ a basate. Nte mikɔa akũ mikpa ɬɔkpa kakena ni, letsa a kĩ laane ne foe kame nye wuda, leme nte mikena ne Baguma ɔledo akũ ni, foe nfaso nye kadzi kpĩ ne Baguma ane.

XVII Bɔanyɛ Baguma kɔlɛ paa, kitonekĩ tito kĩ minya tɔkpa basate miyatẽ malo ni, finyaa mite ɔnɔkɔali fɔtsa katsa a mɔ mi towɔlɛ, milamɔ foe akũ kakɛna pɛpɛpɛ. **XVIII** Baguma nyɛ mi etomena tɔkpa kamɛ, midani fɔtsa wĩ kakɛna basate.

XIX Malɛ kɔdzɛla ndɛ otidziwa aye nɛ ayekĩ otidziwa ado nɛ sukɛna kamɛ sũ. Nɛ lɔkɔ lidi kĩ letẽ kamɛ ni, mifɔnɛ mi akũ flee awɛ ndɛ basate mikpa efĩ mɔ ablo fɔtsa kakɛna. Ade ayea kɛnɛ kĩ finyaa miafɔnɛ mi akũ flee awɛ mikpa ndɛ tuwĩ kakɛna basate a. **XX** Kĩ minya tɔkpa kakɛna basate a, tuwĩ kakɛna tánya ɔhɛ fɔkpa mi. **XXI** Litsa nfasɔ mina mitomena fɔtsa a kĩ mikakɛna a kĩ finyaa fɔakɔ mi kɔnyɔã a kamɛ? Fɔtsa a na bamɛ flee kawũna nyɛ wuda.

XXII Lemɛ finyaa, Baguma nyɛ mi nɛ tɔkpa kamɛ midani ye basate. Nfasɔ a kĩ míana nyɛ kĩ miakɔa mi akũ flee mikpa Baguma ɛkpalɛ ye akũ, lɔkɔa nɛ foe kawũna mina nkpã kĩ elá kawũna a. **XXIII** Kitonekĩ tɔkpa kɔtɔkase nyɛ wuda, lemɛ Baguma futetsa faa nyɛ nkpã kĩ elá kawũna a, nɛ ɔmɔa kakɛna mɔ boe ɔlate Kristo Yesu kamɛ.

VII

Nfantuhũ Kĩ Eto Kɔtsɔ̃ Kakɔã Kamɛ.

I Nwaẽ amɛ, mi a kĩ minyina Mose mbla a, míanu letsa a kĩ mawɛ kĩ malɛ nɛ awĩ a kayɔ. Mbla anya oti akũ nɛ lɔkɔ a kĩ edzi nkpã a odi. **II** Foe nfantuhũ nyɛ kĩ mbla sui otsole kĩ edzi kɔnyɔ edo nɛ ɔnyɔ kayɔ nɛ onyole a nkpã kamɛ. Lemɛ nɛ onyole a ku ni, otsole a né nɛ mbla a

kĩ esui ye emena mo onyole a kame. ^{III} Foesũ nte otsole a naa onyole bebã sekẽ ne loko a kĩ onyo a buki edzi nkpã ni, baave ye odopaani. Leme nte onyo a ku kô ni, mbla kii tã sui ye, ade nte enadzi mo onyole bebã ni, etãboa adopaa.

^{IV} Nwaẽ ame, ade aye fola fokpa mi malo a. Ne mbla a onukpẽ ni, mi malo miku, kitonekĩ minye Kristo sukena a seke sidi. Ade finyaa minye ye a kĩ Baguma dzela etomena kanokpa a bade, ayekĩ bóane libi bokpa Baguma. ^V Kitonekĩ kĩ budzi nkpã ne sukena kame a ni, sukena fowetsa kpa a kĩ mbla a dzela ne boe kame a, kena adzuma ne boe kame, emane boe ekpa wuda. ^{VI} Leme finyaa boné ne mbla a kayo, kitonekĩ buku bokpa fotsa a kĩ fusuli boe nde kola bawane a. Boláabuki busum ne mbla kĩ betsele osi koe a akũ, mbom bóasum ne Hũhũ kame osi võe a akũ.

Mbla Afõ Oti Akena Tokpa.

^{VII} Finyaa litsa bóale? Kale bóale kĩ mbla nye tokpa? Oowo! Fola lomo. Leme mbla a lefõ ñnyi letsa a kĩ tokpa ane. Nte mbla a etale kĩ, “Tayoola ane ne oti bebã fotsa akũ” ni, kufe ñnyina anengbã kawe a na. ^{VIII} Leme fotsã mbla a akũ, tokpa na osi tinyina odo kako fotsa kpa flee ne yĩ kame. Nte mbla kalaa elaa ni, kufe tokpa leme ku. ^{IX} Yĩ moawe a ndzi tõ nkpã, kĩ mbla a tána, leme kĩ mbla a ya a, tokpa yidza tidzi nkpã, ^X ade nku a. Ade mbla a kĩ kufe ema yĩ nkpã a, yĩ kõ wuda ekoa ema yĩ. ^{XI} Tokpa tsã mbla akũ tena osi teke yĩ, ade teko yĩ a.

^{XII} Foesũ mbla moawe a akũ kpale, ade ayea ye nhihie a adã kpĩ, enene leme a. ^{XIII} Lokoa letsa

wĩ a kĩ lenene a dani wuda lekpa yĩ? Oowo! Fólá lómó. Tókpa tsã tuwĩ akũ tekwa wuda tema yĩ, ayekĩ taanye te kutitse paa a tetsa. Foesũ fotsã mbla akũ benye tókpa betsa nde letsa kpa kĩ liti lenéne koũ.

Kawũkano a Kĩ Kideĩ Ne Oti Kame.

XIV Bunyina kĩ mbla a nye hũhũ kame fotsa, leme yĩ kũ ñnye otidziwa, kĩ beno osate bekpa tókpa. **XV** Maánu yĩ fotsa kenawa a kayo, kitonekĩ maákena letsa a kĩ mawe kĩ makena a, mbom makena letsa a kĩ makesĩ a. **XVI** Nte letsa a kĩ maáwe a makena kũ ni, kekũ ntuno kĩ mbla a nene. **XVII** Foesũ nné yĩ moawe akena fotsa a, mbom tókpa a kĩ tideĩ ne yĩ kame a akena foe.

XVIII Ñnyina kĩ tuwĩ tidima lidzi ne yĩ kame ayekĩ ñnye otidziwa sũ. Kitonekĩ tito kĩ kawe a kĩ makena tuwĩ deĩ ne yĩ kame malo ni, maápuli nkena te. **XIX** Tuwĩ a kĩ mawe kĩ makena a, maákena te, mbom makena tókpa a kĩ maáwe kĩ makena a. **XX** Nte letsa a kĩ maáwe a makena ni, kekũ nné yĩ moawe a akena foe, mbom tókpa a kĩ tideĩ ne yĩ kame a akena foe.

XXI Foesũ mmó mbla kũ foletsa ñyi osũ, kĩ nte mawe kĩ makena tuwĩ ni, tókpa mbom makena. **XXII** Ne yĩ kamekame ni, mamó kawole ne Baguma mbla a akũ. **XXIII** Leme mamó mbla bebã ne yĩ sukena kame kĩ yano lema mó yĩ loló kame tuwĩ kĩ mawe a. Ekena yĩ kola owane ekpa tókpa mbla a kĩ edeĩ ne yĩ sukena kame. **XXIV** Nkema oti kĩ ye akũ ako konya. Owei aate yĩ etomena sukena kĩ sekpã yĩ sanamena wuda kame a awe? **XXV** Kole boanye Baguma botsãmena boe Olate Yesu Kristo akũ.

Finyaa, ayekĩ nla nye kĩ ne yĩ mɔa akũ akũ ni, nneɛ yĩ adzuma makena ne Baguma mbla a akũ, leme sukena a kɔ ni, nne masum tɔkpa mbla a.

VIII

Nkpã Kadzi Ne Baguma Hũhũ a Onukpě.

^I Foesũ finyaa kɔtɔkako leláa kekpa bikĩ bekená ɔmɔa mɔ Kristo Yesu a. ^{II} Kitonekĩ Hũhũ mbla a kĩ yakpa oti nkpã ne ɔmɔa kakena kame mɔ Kristo Yesu a, nye yĩ etomena tɔkpa mɔ wuda mbla a kame. ^{III} Letsa a kĩ mbla a tápuli ekena a, ayekĩ sukena a te kɔbě ne ye awe sũ ni, Baguma kɔ kena foe. Edo ye mɔawe obi eya ne otidziwa sukena kĩ sakena tɔkpa kame, ade eyako tɔkpa kɔtɔ, enye te a. ^{IV} Baguma kena fukĩ ayekĩ boe a kĩ budzi ne Hũhũ kame, kĩ nné ne sukena kame a, bóapuli budzi ne tuwĩ kakena a kĩ ye mbla awe a onukpě.

^V Bati kĩ bidzi nkpã nde ayekĩ be sukena awe a onukpě ni, fɔtsa a kĩ be sukena awe a akũ bakɔna. Leme bikĩ bidzi nkpã nde ayekĩ Hũhũ a awe a onukpě ni, fɔtsa a kĩ Hũhũ a awe a akũ be adzuni ana. ^{VI} Oti kadzi ne sukena fɔwetsa tsẽmɔ wuda, leme oti kĩ Hũhũ a akpã ye a, ana nkpã mɔ lukudɔ. ^{VII} Ne foesũ oti a kĩ ye sukena fɔwetsa nya ye akũ a adani Baguma okesĩne, kitonekĩ yaákena ne Baguma mbla akũ, ade ne ɔnɔkɔali kame ni, eláapuli ekena ne ye akũ. ^{VIII} Bikĩ bidzi nkpã ne be sukena kawɛ onukpě a fɔkelatsa leláapuli fuwo Baguma anɛ.

^{IX} Leme mi kɔ midzĩ ne sukena kawɛ onukpě, mbom midzi nde ayekĩ Hũhũ a awe kĩ midzĩ a.

Odi nye odi kī Kristo Hūhū leláa ye kame lenyé Kristo ode. ^X Leme nte Kristo deñ ne no kame a, Hūhū a nye nkpā ekpa no, kitonekī ekena no oti kpīi ne Baguma ane, tito kī no sukena ayaku malo ne tokpa sū. ^{XI} Nte Baguma Hūhū a kī edzela Yesu etomena banokpa kame a deñ ne mi kame ni, kekō oti a kī edzela Kristo etomena banokpa kame a leme aakpa mi sukena kī saku a nkpā, ne ye Hūhū a kī edeñ ne mi kame a sū.

^{XII} Foesū nwaē ame, budeñ adzuma adi kī kene kī bokena leme fonyé kī boadzi nkpā nde ayekī boe sukena awe kī budzi a. ^{XIII} Kitonekī nte midzi nkpā ne sukena kawε onukpē ni, míaku. Leme nte mitsā Hūhū kame miko mi fokelatsa kpa a, míana nkpā. ^{XIV} Bati a kī Baguma Hūhū akpā a flee nye Baguma babi. ^{XV} Kitonekī Hūhū a kī Baguma kpa mi a tákena mi basate mikavila, mbom Hūhū a akena mi Baguma babi. Ade Hūhū a kobē afō boboa fowola kave Baguma kī, “Abba!” kī foe kayo nye kī “Ao Nda!”

^{XVI} Baguma Hūhū a moawe lekena omoa mo boe hūhū yadi adansie kī Baguma babi boane. ^{XVII} Nte bonye ye babi ni, bonye ye adzapadie leme banyane, ade bomo Kristo bóanya adzapadie a kī Baguma kpa eyi ye a. Foesū nte bona tsefā ne Kristo lubo kamō a kame ni, bóana tsefā leme ne ye kukūkpale a kame a.

Kukūkpale a Kī Kɔaya a.

^{XVIII} Makona kī boláapuli bokoa lubo a kī boamo finyaa a bokonamo Baguma kukūkpale a kī baanye betsa boe a kolaa. ^{XIX} Fotsa a kī Baguma boa a flee dzi foadzole mo akū kasī kī

Baguma enye ye babi etsa. **XX** Kitonekĩ beko fotsa a kĩ Baguma boa a flee koto kĩ fonye fotsa pupulidza, nné ne foe kawε akũ, mbom Baguma lεwe kĩ fona lomɔ. Lemε konete a deĩ kĩ, **XXI** luwi lidi ni, fotsa a kĩ bebɔa flee aanyε foe akũ ne tesate ɔsum kĩ yabu kade a kame, fɔyaawo ne akũ akũ kadzi mɔ kukũkpale a kĩ Baguma aakpa ye babi a kame.

XXII Kitonekĩ bunyina kĩ keyawo nviã loko kĩ a, fotsa a kĩ Baguma boa a flee abe ayolohɔ nde ɔmatsɔ kĩ semε pi ye aye. **XXIII** Lemε nné fotsa kĩ bebɔa a odi abe ayolohɔ, mbom boe a kĩ Baguma kpa ye Hũhũ nde ye futetsa fotonyade a lemε boabe ayolohɔ ne boe kame, kadzɔle Baguma kĩ ekena boe ye babi a, enye boe kutitse a flee. **XXIV** Kitonekĩ ade konete kĩ sũ bona kate a, lemε nte boamɔ konete fotsa kɔkɔε ni, fubuki fonyε konete. Kitonekĩ oweĩ akɔa anε kate ne fotsa a kĩ yamɔ a akũ? **XXV** Lemε nte boe anε teĩ ne fotsa a kĩ boámɔ akũ ni, boana ɔwɔle boεε kadzɔle foe.

XXVI Ade ayea Hũhũ a lemε aayabumɔ boe a kĩ bɔdo a, kitonekĩ bunyina ayekĩ kefeta kĩ boabɔa mpae bɔkpa Baguma. Hũhũ mɔawe a abe ayolohɔ kapili boe lolɔ ne Baguma sekε mɔ folets a kĩ onukpε lɛlápuli εε. **XXVII** Ade Baguma a kĩ yamɔ bati tɔwɔle kame a nyina lets a kĩ lenye Hũhũ a adzuni, kitonekĩ Hũhũ a ake Baguma aduli ne ye bade lolɔ nde ayekĩ Baguma awε a.

XXVIII Bunyina kĩ Baguma akena fotsa flee foaboomu kakena fuwĩ kakpa bati a kĩ bawε ye kale a, kĩ εve ne ye nhihie onukpε a. **XXIX** Bati a kĩ Baguma nyi enyamen a loto a, epau be eyi kĩ

beyaakena nde ye Obi aye, ayekĩ ye Obi a aanya be otonyade ne bawaẽ pii kame. **XXX** Foesũ bati a kĩ Baguma nye eyi a, ade be eve a, ade bikĩ eve a, ekena be bekpola ade ekpa be tsefã ne ye kukũkpale a kame a.

Yesu Kristo Nye Baguma Ọdo a Etsa Boe.

XXXI Nte bɔkɔna fukĩ flee akũ a, litsa bɔapuli bɔle? Nte Baguma dzẽ ne boe liti a ni, owei aapuli eyidza edza ne boe akũ? **XXXII** Nte Baguma a kĩ etásĩ ye mɔawe Obi kakɔa kakpa, mbom ekɔa ye ekpa faa ne boe flee lolɔ a ni, nde fɔanya kĩ eláakɔa fɔtsa bebã flee faa ebu Obi ekpa boe? **XXXIII** Owei aapuli ebɔe fɔletsa ne bati a kĩ Baguma pau a akũ? Baguma mɔawe di adansie kĩ betáku kɔto. **XXXIV** Foesũ owei aako be kɔto? Nné Kristo Yesu a kĩ eku ãye kĩ Baguma dzela ye etomena banɔkpa kame, edzi nkpã ne Baguma sɔmɔna, yake ye aduli ne boe lolɔ a!

XXXV Kekɔ owei ãye litsa aapuli etsua bɔmɔ Kristo ọdo a kayite? Lubokamɔ aapuli, mbɔee ɔhau, mbɔee bati liti katomena, mbɔee kolekako ãye ohiã, mbɔee ɔdzɔ kadzi, mbɔee wuda libe, mbɔee kĩ wuda? **XXXVI** Katsela Kpalewa a le kĩ, “Nɔ sũ, bako boe loko nye loko.

Ade babu boe nde baveli kĩ bekpã banaako aye.”

XXXVII Ne fukĩ flee kame a, bɔtsã Kristo kĩ yawe boe kale a akũ bɔba ayekĩ bɔkɔna malo. **XXXVIII** Kitonekĩ nte ndo kĩ letsama leláapuli lenye boe ne boe Ọlate Kristo ọdo a kame. Fɔláanya wuda ãye nkpã, ode fɔto banyane ãye hũhũ kpa kɔbẽ kudi, loko kĩ ãye loko kĩ laaya, **XXXIX** katinya

kĩ kideĩ ne ode ãye katinya kĩ kideĩ ne tite kayo ãye fotsa a kĩ beboã a kame fudima. Letsama koũ leláã katinya kame flee kĩ láapuli lenye boe ne Baguma odo a kĩ bona bõtsãmena boe Olate Kristo Yesu akũ a kame!

IX

Baguma Pau Yudafõ Nde Ye Bati Aye.

^I Letsa a kĩ male a nye onokõali, Kristo ode mane ade maãma fõvã a. Yĩ owõle kĩ Hũhũ Kpalewa anya ye akũ a akpa yĩ katekado kĩ nné fõvã mama. ^{II} Mabe ayõlõhõ, ade nte kalõe kĩ kaádo ne yĩ owõle kame, ^{III} kakpa yĩ bati a kĩ bõmõ be bõnye sukena mõ babõane mõã. Ne be sũ maawe kĩ Baguma edumu yĩ faa, esẽ bõmõ Kristo kayite malo kufe. ^{IV} Kitonekĩ ade be nye Israel õmã a kĩ Baguma pau, ekõã ekena ye bade, enye ye kukũkpale a etsa be a. Esui onukpẽ mõ be, ekpa be ye mbla a leme. Be nee Baguma õsum osi wĩ a, ade be leme ekena bõhe ekpa a. ^V Be kasinu to Hebrifõ bawanyõ a kĩ bete buĩ a kame, ade be kade kame Kristo leme ne eto nde otidziwa aye eya a. Mifõ bumu Baguma a kĩ yanya fotsa flee akũ daa daa a! Fõya lõmõ.

^{VI} Nlãmõ kale kĩ Baguma kalekayi a táya ne foe kame, kitonekĩ nné bati a kĩ bito Israel a flee nye Israelfõ kpanunu. ^{VII} Ade ayea nné Abraham kasinu babi a flee nye Baguma babi. Baguma bi Abraham kĩ, “Isak akũ fõatsã mõ aana babi mõ bawa a kĩ nle ãyi a.” ^{VIII} Foe kayõ nye kĩ nné babi a kĩ Abraham ma nde bati ayea nye Baguma babi, mbom bikĩ ema ne ye bõhe kame a. ^{IX} Kitonekĩ Baguma bõhe a nye, “Kateliva, lõkõ kũĩ kame a,

maamuniki ñya ade Sara aama obinyole a.” X Nné fukĩ odi a. Babinyole nviã a kĩ Rebeka ma a ɔlega nye boe ɔwanyɔ Isak. XI-XII Leme ne ayekĩ babinyole nviã kame ɔmɔa kapau fɔya ne foe kame ne Baguma nhihie onukpẽ sũ ni, Baguma bi Rebeka kĩ, “Obinɔkɔẽ a aasum obisẽde a.” Ebi ye eyi kɔkɔe fɔmɔ eyama babi a. Foesũ Baguma kapau a kĩ ekena a ledzẽ ne tuwĩ ñye tɔkpa a kĩ nta babi a kame odi kena a akũ, mbom Baguma kawɛ fɔanɛ. XIII Bele ne Katsɛle Kpalɛwa a kame kĩ, “Nwe Yakob kale, leme nkesi Esau.”

XIV Lɔkɔa bóale kĩ Baguma leme ládã kpĩ? Oowo! Fɔlá lɔmɔ kɔlaa. XV Kitonekĩ ebi Mose kĩ,

“Odi nye odi kĩ mawɛ kĩ makena semɛ kale nkpa ni,

ade ye maakena semɛ kale nkpa a.

Ade odi nye odi kĩ ye akũ kɔ yĩ kɔnya ni,

maamɔ ye kɔnya.”

XVI Foesũ Baguma oti kapau ledzẽ ne ye mbɔdibɔ ñye letsa a kĩ yawɛ a akũ, mbom letsa nye letsa dzẽ ne Baguma kɔnyakamɔ odi akũ. XVII Kitonekĩ ne Katsɛle Kpalɛwa kame a, Baguma bi Egipte legã kĩ, “Ndzina nɔ legã ayekĩ maatsã nɔ akũ ñnye yĩ kɔbẽ ntsa, lɔkɔa yĩ dĩ legba ne katinya kame flee.” XVIII Foesũ odi nye odi kĩ Baguma awɛ kĩ yamɔ kɔnya a, ade ye yamɔ kɔnya a, ade odi nye odi kĩ yawɛ kĩ ena atɔ ɔsĩ a, yafĩ yana atɔ ɔsĩ.

Baguma Kalɔkpa Mɔ Kɔnyakamɔ a.

XIX Mi kame odi aavia yĩ kĩ, “Nte fɔla lɔmɔ a, nde sũ Baguma buki yanye nfumususu kakpa odi? Owei aapuli eyidza edza ne Baguma kawɛ

akū?” **XX** Nɔ otidziwa, owei anɛ kī akpa Baguma mbuaye lomo? Lubui lāvía de omene kī, “Nde sū omɛ yī lomo?” **XXI** Fubui omene deī osi kī yakɔa tĩbute a kī enuna ebɔa lɔbɔ a emɛ letsa a kī yawɛ. Mbɔɛɛ elá osi kī yakɔa tite lɔbɔ mɔape a emɛ fubui nviã? Yaame lomɔa kī lalɛ kadã eyi ekpa fuwi titiliwu, lokɔa ekɔa te nkaɛ a emɛ lɛbebã kī laálɛ kadã eyi ekpa luwi daa akū adzuma kakena. **XXII** Ade letsa a kī Baguma kɛna a kayɔ nɛ awī a. Nte Baguma wɛ kī yanyɛ ye kalɔkpa kanya, efɔ bemo ye otumi, lemɛ ebuki ena owɔlɛ bɔɛɛ epini bikī be akū ena kalɔkpa, kī bidum be bekpa kawɔla a ni, litsa odeī kī aalɛ? **XXIII** Ade nte Baguma wɛ lemɛ kī yanyɛ ye kukūkpale baū a kī biko nɛ boe a kī emɔ konya akū a, boe a kī emane eyi ekpa ye kukūkpale a, **XXIV** kitonekī boe nye bati a kī epau etomena Yudafo mɔ bikī benyé Yudafo a kame a ni, odeī kadi kalɛ? **XXV** Ade fukī Baguma lɛ nɛ Onukpɛ Ŋnyene Hosea ovoli kame kī,

“Bati kī benyé yī omaī bati a, maave be kī, ‘Yī bati.’

Kade a kī ntáwɛ ke kalɛ a, maave ke ‘Yī ɔɔɔ bati.’

XXVI Nɛ kako mɔape a kī bibi be kī,
‘Minyé yī bati’ a

Ade awã baave be kī ‘Baguma Kī Edzi Nkpã Daa a babi.’ ”

XXVII Baguma Onukpɛ Ŋnyene Yesaya boa fowɔla elɛ nɛ Israelfɔ akū kī,

“Nte Israelfɔ nɛ lidede ndɛ mpo abuī dã malo ni,
be kame bati sukuloo badi aana katɛ,

XXVIII kitonekĩ boe Ɖlate aadzemo katinya kame bati pepepe moatse, etsua letsa nye letsa lukũ.”

XXIX Yesaya buki ele eyi kĩ,
 “Nte boe Ɖlate Otumifo Flee a etatina boe babi mo bawa a badi ni,
 kufe bodani bokena nde Sodom, buketimo Gomora!”

Kale Wĩ a Nye Israelfo Lemε Kade.

XXX Foesũ litsa koũ bóale? Matsa kĩ bikĩ benyé Israelfo a kĩ betápili kĩ badzi kpĩi ne Baguma ane a, bekena be bati kĩ bekpola betsāmena be katekado akũ. XXXI Ade Israelfo a kĩ bekawe mbla a kĩ yaakena be bati kpĩi a, tápuli bekena ne mbla a akũ a. XXXII Litsa sũ betápuli? Kitonekĩ betákɔa katekado bewε foe, mbom bekɔa ane bite ne be moawe mbodibo akũ. Ne foesũ bitula ne Kristo kĩ ela nde de a kĩ bati atula ne de akũ a akũ, XXXIII nde ayekĩ betsele ne Katsεle Kpalεwa a kame kĩ,
 “Midā! Nkɔa de lidi mayi ne Zion,
 de kĩ bati aatula ne de akũ bene beto.
 Lemε odi nye odi kĩ εte ye edo ni,
 konyoã leláawo ye.”

X

^I Nwaē ame, letsa a kĩ mawe ne yĩ owole kame flee, mo mpae kĩ mabɔa ne de akũ kakpa Baguma nye kĩ, efõ yĩ awe kade bati bena nkpā kate!
^{II} Maapuli ndi adansie kĩ bekɔa be akũ flee bekpā Baguma osum, lemε binyína ayekĩ basum ye ne osi wĩ akũ a kanyina wĩ. ^{III} Betányi osi a kĩ Baguma atsā kabu bati kĩ bidzi kpĩi ne ye ane, foesũ bewε be moawe tisi kĩ batsā bekena fotsa

biwo Baguma anε, ade foesũ betákɔa be akũ bekpá Baguma osi a kĩ yatsã kakena bati kpĩ a. ^{IV} Kitonekĩ Kristo nye Mose mbla a kawũna, ayekĩ odi nye odi kĩ εte ye edo ni, baabu ye oti kpĩ.

Baguma Aakpa Odi Nye Odi Nkpã.

^V Mose tsele eyi εtsa ayekĩ oti adzi kpĩ ne Baguma anε nte edi mbla a akũ. Ελε kĩ, “Odi nye odi kĩ εkena ne mbla a akũ pεpεεε ni, yaana nkpã.” ^{VI} Leme letsa a kĩ Katsεle Kpalewa a le ne ayekĩ oti aadã kpĩ ne katekado kame nye kĩ, “Tavia nɔ akũ kĩ, ‘Owei aade εnaa ode?’ kĩ fɔatsa kĩ εnaakpã Kristo eto kanɔkpade ede εya. ^{VII} Iye tavia kĩ, ‘Owei aaka εnaa kayɔ?’ Foe nye kĩ owei aanaa kanɔkpade εnaakpã Kristo εyamena.”

^{VIII} Letsa a kĩ yatsa a nye kĩ, “Baguma kale a fuã nɔ plepleple, kideĩ ne nɔ onukpε mɔ nɔ ɔwɔle kame.” Ade katekado ɔledo a kĩ bɔade letsã ne ke akũ a ne awĩ a. ^{IX} Nte ɔkɔa onukpε ɔle kĩ Yesu nye boe ɔlate, mɔ ɔte odo ne nɔ ɔwɔle kame kĩ Baguma dzela ye etomena banɔkpa kame ni, Baguma aakpa nɔ nkpã. ^X Kitonekĩ ɔwɔle bakɔa kate kado kana kadzi kpĩ, ade onukpε bakɔa kanye foe kanya mɔ Baguma akpa boe nkpã. ^{XI} Katsεle Kpalewa a le kĩ, “Odi nye odi kĩ εte ye edo leláate konyɔã.” ^{XII} Odi nye odi deĩ ne foe kame, kitonekĩ ntsitsemu adima leláa Yudafɔ mɔ bikĩ benyé Yudafɔ a kayite. Baguma mɔape a nye bati flee ɔlate, ade yakpa akũ kana fɔtsa nhila pii bikĩ babɔa mpae kave ye a. ^{XIII} Nde ayekĩ Katsεle Kpalewa a le a, “Odi nye odi kĩ yaave boe ɔlate a dĩ ni, yaana nkpã.”

XIV Leme nde bati aakena beve oti a kī betáte ye bido a? Nde baakena bete oti a kī betánu ye foletsa a bido? Ade nte betáde letsā ne foletsa a akū a, nde baakena binu ye dī? XV Ade nde baakena bide letsā Baguma foletsa nte betádo foto banyane? Ade foe akū mō Katselē Kpalēwa a le kī, “Bato a kī beyaade letsā ne Kalē Wī a akū a kaya ale kadā paa!”

XVI Leme nné bati flee letē Kalē Wī a, kitonekī Yesaya le kī, “Boe ɔlate, owei letē boe kalē a edo?” XVII Foesū katekado ato kalē a kanu kame, ade foletsa a kanu ato letsā kade ne Kristo akū a. XVIII Leme mavia kī ɔnokɔali foane kī betánu Baguma foletsa a kɔlaa? ɔnokɔali binu foe, kitonekī Katselē Kpalēwa a le kī,

“Letsā badene a odo tsena katinya kame flee,
ade be foletsa a gba fonawo katinya
kawūnakō a flee.”

XIX Mavia bio kī lɔkɔa kanu Israelfo a tánu foletsa a kayo? Mose moawe lenya loto ele kī, Baguma le kī,

“Maafō mino lineke mō bati kī benyé omaī a.
Maakɔa omaī a kī etábinya ane a ndo mi
kalokpa.”

XX Ade Yesaya do ɔwɔle eba ebi be kī, Baguma le kī,

“Bati a kī betáwe yī liti osi a, ade be lemó yī a
bati a kī betávia yī akū a, ade be ñnye yī akū
ntsa a.”

XXI Baguma buki ele ne Israelfo akū kī,

“Luwi mōa flee ndzele yī akpo kame nkpa
bati a kī bideī ato ɔsī,
kī biyidza bedza ne yī akū leme a.”

XI

Baguma Mó Israel Ōmaĩ a Konya.

^I Foesũ mavia kĩ Baguma pu ye mɔawɛ bati a flefle? Oowo! Yĩ mɔawɛ Israelni manɛ, ãnye Abraham kasinu ɔwa, kĩ nto Benyamin katete a kame. ^{II} Baguma tápu ye ɔmaĩ a kĩ epau eyi kito kayɔkayi a. Mbɔɛɛ minyína letsa a kĩ betsele ne Katsɛle Kpalɛwa a kame, awã a kĩ Eliya ke Baguma aduli ne Israelfɔ lolɔ a? Ele kĩ, ^{III} “Boe ɔlate, beko nɔ onukpɛ banyɛnɛ, ade bidzuli nɔ afɔlibɔ tetɛnyɛ a. Yĩ odi keĩ lite ade bawɛ kĩ bako yĩ malo a!” ^{IV} Lemɛ nde Baguma kpa Eliya mbuayɛ? Ebi ye kĩ, “Ntina bati mpim evũkɔnɔ kĩ betásum Baal baviɔ a ãyi nkpa yĩ akũ.” ^V Ade aye fɔla ne finyaa lɔko kĩĩ kame malo a. Israelfɔ sukuloo badi te kĩ Baguma mɔ be konya epau eyi a. ^{VI} Baguma mɔ be konya, epau be, nné ne be adzuma a kĩ bekɛna a sũ. Kitonɛkĩ nte bati kapau dzɛ ne be lekɛnana akũ ni, kekɔ ye konyakamɔ a buki konyé konyakamɔ.

^{VII} Foesũ nde? Israelfɔ a tána letsa a kĩ bekawɛ a. Lemɛ be kame badi sukuloo a kĩ Baguma pau a lena foe, ade be nkaɛ kɛna ato ɔsĩ ne Baguma kavɛ akũ a. ^{VIII} Nde ayekĩ Katsɛle Kpalɛwa a le kĩ,

“Baguma fɔ be adzuni mɔ be tɔwɔle dɔ kĩ baánu fɔletsá kayɔ,
Ade kito ne ke keyawo nviã kĩĩ a,
baápuli bɛmó biyi ɔsũ ãye binu foe kayɔ.”

^{IX} Ade Dawid le kĩ,

“Baguma efɔ be kanyakɔ opunu ɛdani kpɛĩ epi be,

mŏ letsa a kī baatula betŏ fŏnya be sŏtŏ kavεε.

X Efŏ be anε eke ŏtū ayekī beláamŏ fŏkŏ,
efŏ bikūūkū nε be lubokamŏ kayŏ daa daa.”

XI Finyaa mavia kī, kī Yudafŏ tula benε betŏ a, bekahŏ kŏlaa nε awā? Oowo! Ayekī bekena tŏkpa sū ni, nkpā katε a ya nε bikī benyé Yudafŏ a sekē, ayekī Yudafŏ a aanŏ be lineke. XII Nte Yudafŏ tŏkpa yamεna akū kana nhila baū nε katinya kamε, mŏ nte be hūhū kamε katŏ a ma bikī benyé Yudafŏ a nhila pii ni, kekŏ nhila a aabluŏ paa nte Yudafŏ a flee dani bekena Baguma bade.

Bati Kī Benyé Yudafŏ a Malo Na Nkpā Kats.

XIII Ade mi a kī minyé Yudafŏ a mabi fŏletsa finyaa a. Ayekī ĩnye bikī benyé Yudafŏ a fŏtŏ ŏnyanε sū ni, maapia nε adzuma a akū. XIV Ōsa fŏatsā ye kakena kamε ni, maapuli nfŏ yī kade bati lenŏ lineke ayekī maapuli nte badi nkpā. XV Kitonεkī kī Baguma fŏnε be awε a, εkpŏla batidziwa kī benye ye bakesīnε a εkena be ye bakŏba. Foesū ndε fŏana nte Baguma buki εte be? Fŏana ndε nkpā εkpa banŏkpa! XVI Nte abodoo sεke setonyade a kī bekŏa bekpa Baguma akū kpale ni, kekŏ ye nkaε a lemε akū kpale. Ade ayea nte bekŏa kutse tunu bebŏa afŏliε bekpa Baguma ni, koe tenanε a lemε nye ye tide.

XVII Bitsua kugua kutse kī bidu a tenanε tidi benye, ade bekŏa lupŏ kamε kugua kutsede tenanε beyatale nε koe akū a. Mi a kī minyé Yudafŏ a la ndε lupŏ kamε kutse tenanε a kī bekŏa beyatale nε kukī bidu akū a, ade

finyaa míana kutse a tunu kame funitsã a fudi. ^{XVIII} Foesũ mitasupa bikĩ bitsua benye nde tenane aye a. Nde sũ miapia akũ mitsa be? Mite ane kĩ tenane keke miane, nné mi nye kutse tunu a, mbom tunu a pini mi. ^{XIX} Leme osa no aale kĩ, “Bitsua tenane a benye kĩ yĩ nna ne te kadokõ.” ^{XX} Fonye onokwali. Bitsua te kitonekĩ betáte bido, ade mina kadzakõ ne mi katekado sũ a, foesũ mitapia ne foe akũ, mbom mikavila. ^{XXI} Kitonekĩ nte Baguma támõ Yudafõ a kĩ bela nde kutse kpĩ a tenane a konya ni, okona kĩ yaamõ no konya?

^{XXII} Dã ayekĩ Baguma deĩ seme kale, mõ ayekĩ edeĩ osĩ. Baguma deĩ osĩ ne bikĩ bene betõ akũ, leme edeĩ seme kale ekpa no nte osila odzi ne ye seme kale a kame. Leme nte otádzi lomõ ni, Baguma aatsua no malo enye ne kutse a akũ. ^{XXIII} Ade nte Yudafõ a muniki beyate Baguma bidoi ni, Baguma aakõa be edzela ne be kadzakõ kõe a, kitonekĩ Baguma aapuli ekena foe. ^{XXIV} Mi a kĩ minyé Yudafõ a, mila nde lupõ kame kugua kutse tenane a kĩ bitsua beyatale ne kugua kutse wĩ a akũ a aye. Yudafõ a la nde kugua kutse a kĩ bidu a, foesũ folá osĩ fokpa Baguma kĩ yaabuki ekõa kugua kutse mõawe tenane a kĩ bitsua benye a etale ne kutse mõawe a akũ.

Baguma Amõ Bati Flee Kõnya.

^{XXV} Nwaẽ ame, onokwali foletsa belawa fudi deĩ kĩ mawe kĩ minyi, ayekĩ miláabu mi akũ anyansãfõ. Ade foe nye kĩ Israelfõ badi atõ osĩ a aana kenaawo kĩ, bati a kĩ benyé Yudafõ a, kakã flee ya ne Baguma sekẽ. ^{XXVI} Nte foya lomõ fuyua

a lɔkɔa Yudafo a flee aana kate, nde ayekĩ Katsɛɛ
Kpalewa a le kĩ,

“Ɔtɛnɛ a aato Zion ɛya.

Yaanye ablo fɔtsa flee enɛmɛna nɛ Yakob
katete a kame a.

XXVII Maakena bohe kĩ mɔ be,
nte ãnye be tokpa nnamena.”

XXVIII Nɛ Kale Wĩ a akũ kɔ ni, Yudafo a dani
Baguma bakesĩnɛ nɛ mi a kĩ minyé Yudafo a sũ.
Lɛmɛ nɛ Baguma be kapau sũ ni, benye Baguma
bakoba nɛ be bawanyo sũ. XXIX Kitonɛkĩ Baguma
ládani ye adzuni nɛ oti a kĩ epau ãye ehila a akũ.

XXX Kɔkɔɛ a, mi a kĩ minyé Yudafo a, mitákɛna nɛ
Baguma kawɛ akũ, lɛmɛ finyaa Baguma mɔ mi
kɔnya kitonɛkĩ Yudafo a na ato ɔsí. XXXI Ade ayea
kɔnya a kĩ Baguma mɔ mi a sũ ni, finyaa Yudafo
lɛmɛ lákɛna nɛ Baguma kawɛ akũ ayekĩ Baguma
aamɔ be malo kɔnya. XXXII Ayekĩ batidziwa flee
sĩ kĩ baátse Baguma sũ ni, ɛfɔ bati flee kɛna fɔkɔ
katabu kɔla bawanɛ, ayekĩ yaamɔ be flee kɔnya.

Fɔfɛta Kĩ Bumu Baguma.

XXXIII Baguma akũ kana fɔtsa nɛ lidede paa!

Ye nyansã mɔ kadikanyi kame dzũ paa!

Owei aapuli enye ye kɔtokako kame?

Owei aapuli enu ye tisi kayo?

XXXIV Nde ayekĩ Katsɛɛ Kpalewa a le kĩ,

“Owei nyina boe Ɔlate a adzuni?

Owei aapuli ekpa ye kɔdɛ?

XXXV Owei lekpa Baguma litsedi tɔ,

ayekĩ yaakɛna ese ye kɔto?”

XXXVI Kitonɛkĩ Baguma leboa fɔtsa flee,

ye kobẽ akũ letsa nye letsa dzi nkpã,

ade ye kame lɛmɛ lɛtsa nyɛ lɛtsa aawũna a.
 Obu mɔ kamu nyɛ Baguma fude daa.
 Fɔya lomɔ.

XII

Nkpã Wĩ Kĩ Efeta Kadzi Nɛ Baguma Adzuma Kame.

^I Foesũ nwaẽ amɛ, ayekĩ Baguma amɔ boe kɔnya sũ ni, make mi aduli paa kĩ mikɔa mi akũ mikpa Baguma ndɛ afɔliɛ fɔtsa kĩ fudeĩ nkpã, kĩ foe akũ kpale, fɔawo ye anɛ. Ade fukĩ nyɛ ayekĩ miasum Baguma nɛ ɔnɔkɔali kame mɔ mi towɔle a. ^{II} Mitadzi nkpã ndɛ ayekĩ katinya kĩ kame bati adzi nɛ tokpa kakena kame a, mbom mifɔ Baguma ɛdani mi adzuni ɛkena avɔẽ lokɔa midani ɔbla. Fɔafɔ minyi Baguma kawɛ, fɔtsa a kĩ fɔnɛnɛ, kĩ fɔawo ye anɛ, fɔkpɔla lɛmɛ a.

^{III} Nɛ Baguma kɔnyakamɔ futetsa baũ a kĩ ɛkpa yĩ sũ ni, mabi mi kame odi nyɛ odi kĩ ɛtabu ye tɔnɔkɔẽ ɛba ayekĩ kɛfɛta. Nɛ foe kadokɔ a, ɛkɔna fɔtsa a kĩ fɔatsa akũ kadɔla, lokɔa ɛdzɛmɔ ye akũ ɛdã nɛ katekado a kĩ Baguma kpa ye a onukpẽ.

^{IV} Ayekĩ budeĩ sukɛna fɔkɔ kumɛkumɛ pii nɛ oti mɔawɛ a kame, kĩ fɔakɛna tudzuma futefute a, ^V ade ayea titɔ kĩ bati pii bɔanɛ malo ni, oti mɔa bɔanɛ nɛ Kristo kame, kĩ botsamɔ akũ ndɛ sukɛna fɔkɔ futefute nɛ oti mɔa kame. ^{VI} Baguma mɔ boe kɔnya, ɛkpa boe futetsa futefute, foesũ mifɔ bɔkɛna foe akũ adzuma nɛ ye kɔnyakamɔ a onukpẽ. Ntɛ boe futetsa nyɛ Baguma fɔlɛtsa onukpẽ kanye ni, kɛnɛ kĩ bɔakɛna nɛ katekado a kĩ budeĩ a onukpẽ. ^{VII} Ntɛ boe futetsa nyɛ kĩ

busum bati ni, kene kĩ busum be ayekĩ kefeta, nte futetsa nye fotsa katsa ni, kene kĩ botsa fotsa. **VIII** Nte fonye bati owole kobẽ kado ni, kene kĩ bokena foe. Odi nye odi kĩ yakpa bati fotsa ni, ekena foe mo owole faa. Odi nye odi kĩ edzẽ ne bati onukpẽ ni, kene kĩ ekena adzuma mo osĩ, ade odi nye odi kĩ yakena seme kale kakena ni, kene kĩ ekena foe mo ane kakpale.

IX Miwe akũ kale ne onokoli kame. Mikesĩ tokpa, lokoa mipi fotsa wĩ midomo akũ. **X** Miwe akũ akũ kale nde bawaẽ ne Kristo kame aye, ade odi nye odi ebwa mbodi ekwa obu ekpa owaẽ a. **XI** Mikena adzuma mo osĩ ade mitana onyone a. Misum boe Olate a mo owole kame kobẽ. **XII** Mifõ mi konete a kokpã mi ne kawole kame. Mina owole bese ne mi ohau kame, mikaabwa mpae daa daa. **XIII** Mibumo asoli bati a kĩ badi ahiã a, ade mite banowoẽ faa ne mi toto kame a.

XIV Miwã Baguma kĩ ehila bikĩ bitomo mi liti a. Mivia kĩ ehila be, etadum be. **XV** Mimo kawole mo bikĩ bamo kawole, ade mibe mo bikĩ babe leme a. **XVI** Mina ne adzuni moape kame mikpa odi nye odi. Mitapia akũ, mbom mikena tokoba mo bikĩ bedola be akũ kĩ bati labu ne letsama kame a. Mitabu mi akũ kĩ minyina kadi.

XVII Nte oti odi fum no ni, takwa tokpa ose ye koto. Mibwa mbodi mikena letsa kĩ odi nye odi abu kĩ lenene a. **XVIII** Nte fõale kakena, mo fõato mi sekẽ ni, mimo odi nye odi midzi ne lukudo kame. **XIX** Nwaẽ ame, mitakena odima tokpa mise koto da, mbom mifõ Baguma kalokpa kekena foe. Kitonekĩ Katsere Kpalewa a le kĩ, Olate a le kĩ, “Yĩ

aavele soto, yĩ aakena nse koto.” XX Leme Katsela Kpalawa a le kĩ,

“Nte kole ako no okesine ni, kpa ye funitsã enya.

Nte omoado ako ye ni, kpa ye mui emoa.

Kitonekĩ nte okena fukĩ ni, aafõ konyoã liwo ye paa.”

XXI Tafõ tokpa lenya no akũ, mbom koa tuwĩ kanya tokpa akũ.

XIII

Mikoa Obu Mikpa Omaĩ Akũ Banyane.

I Kene kĩ odi nye odi ebu omaĩ akũ banyane, kitonekĩ otumi odima lelãa kĩ etãto Baguma sekẽ, ade omaĩ akũ banyane a kĩ bidzi finyaa a, Baguma lidzina be. II Foesũ odi nye odi kĩ eyidza edza ne omaĩ akũ banyane otumi akũ a, yidza edza ne letsa a kĩ ehie eyi a akũ. Ade odi nye odi kĩ yakena lomõ a, aavele kotokaku ekpa ye moawe.

III Bati a kĩ bakena tuwĩ a, lãvila bati akũ banyane, mbom bikĩ bakena tokpa a avila be. Owe kĩ bati akũ onyane etahũnahũna no? Kekõ kena letsa a kĩ lenene, lokoa yaamu no. IV Kitonekĩ bati akũ onyane a nye Baguma osumune kĩ yakena adzuma ekpa no kale. Leme nte okena tokpa kõ ni, kekõ vila ye, kitonekĩ edeĩ kobẽ kĩ yavele soto nde ayekĩ kefeta. Baguma foto onyane yane, ade yadã kĩ bekpa bikĩ bekena tokpa a Baguma soto kavele a.

V Ne fukĩ sũ ni, kene kĩ oti adola akũ ekpa omaĩ akũ banyane a, nné ne Baguma soto kavele odi sũ, mbom ayekĩ oti owole fõ enyina tuwĩ a sũ.

VI Ade fukĩ leme sũ miase omaĩ togole a, kitonekĩ omaĩ akũ banyane a akena adzuma kakpa Baguma nte bekena be tudzuma tekpola.

VII Foesũ mise be letsa a kĩ midzimɔ be a. Mise ɔgole mɔ dute mikpa bikĩ kefeta. Mivila oti a kĩ kene kĩ bivila a, ade mibu oti a kĩ kene kĩ bekpa obu a.

Ayekĩ Bɔadzi Mɔ Akũ Akũ.

VIII Mitadzimɔ odima kɔtɔ, kɔtɔ a kĩ mi-adzimena a nye kĩ miwe mi akũ akũ kale. Odi nye odi kĩ ewe ɔwaɛ kale ni, ekena ne Baguma mbla a flee akũ. IX Mbla a kĩ Baguma kpa a le kĩ, “Tabɔa adɔpaa, tako oti, taye, tayoole ane ne nɔ ɔkɔba fɔtsa akũ,” mɔ tebebã a kĩ tibu a flee boomu ne mbla mɔape kame kĩ, “We nɔ ɔkɔba kale nde ayekĩ awe nɔ akũ kale a.” X Nte awe odi kale ni, ɔlaakena tɔkpa ne ye akũ, foesũ ɔɔo nye mbla a flee akũ kakena.

XI Kene kĩ miakena fukĩ, kitonekĩ minyina kĩ loko wo ɔto kĩ mianyinya ne tida kame. Kitonekĩ loko a kĩ Baguma aate boe a nkpã fuã finyaa leba loko a kĩ bɔnya lotɔ bɔte Kristo budo a. XII Lenye loko tẽ liyua, kade lamena kanyina. Mifɔ bɔfɔ ɔtũ kame fɔtsa kakena, lokɔa bɔbɔe kawũ kanɔ fɔtsa bɔbla bɔkpa kanɔ ne ɔhaĩ kame. XIII Mifɔ bupi boe akũ kapi wĩ nde bati kĩ bidzi ne ɔhaĩ kame. Mitafɔ bɔna ne kanya mɔ futo kawole mɔ bave kawuga kame, iye adɔpaa kabɔa, iye ablo kadi, iye kapaa mɔ anengbã kakena kame. XIV Mbom mibɔe boe ɔlate Yesu Kristo kawũ fɔtsa mido nde atadie aye, lokɔa mifɔ mi sukena akũ kadã kakona miyaadani se odo fɔtsa akũ bakenanane.

XIV

Mitadzemo Mo Mi Bakoba Kristofu.

^I Mitε otι a kī etátim ne katekado kame a mido ne mi kame faa, mitavele foletsa mo ye ne letsa kī kenε kī ekena mo likī ketáfeta kī ekena a akū.

^{II} Oti odi katekado kpa ye osi kī enya funitsā fudi nye fufudi, lemε otι a kī ye katekado tátim a kō anya koba kame funitsā odi. ^{III} Oti a kī yanya letsa nye letsa a, etasupa otι a kī yaánya foe. Ade otι a kī yanya koba funitsā odi a, etadzemo ekī yanya letsa nye letsa, kitonekī Baguma te ye.

^{IV} Owei anε kī adzemo otι bebā osumunε? Ye moawe olate aamo nte edzε pintii iye eto. Lemε yaanya akū kitonekī boe Olate a aapuli ekena ye edza pintii. ^V Oti odi abu kī luwi lidi sī leba fuwi bebā a, ade odi lemε adā kī fuwi a flee keti a. Ne fukī odu akū a, odi nye odi edza pintii ne kako moa. ^{VI} Odi nye odi kī ebu luwi lidi paa ni, ekena foe kī yado boe Olate a obu. Ade ayea odi nye odi kī yaánya funitsā fudi a, kena foe kī yado boe Olate a obu, ade yanyε Baguma kole ne foe akū a. ^{VII} Boe kame odima lidzī nkpā ekpa ye akū odi, ade boe kame odima láku lemε kakpa ye akū odi a. ^{VIII} Nte budzi nkpā ni, boe Olate a budzi bokpa, ade nte buku a, boe Olate a buku bokpa. Foesū nte budzi nkpā o-o iye buku o-o, boe Olate a bade boanε.

^{IX} Ade fukī sū mo Kristo ku, ade eyidza edzi nkpā ayekī yaanya bikī bidzi nkpā mo bikī biku a Olate a. ^X Ade no kō, nde sū ako awaε koto? Iye no malo nde sū asupa awaε? Boe a flee bóadza ne Baguma anε kame lokoa edzemo boe. ^{XI} Kitonekī betsele ne Katsεle Kpalewa a kame kī,

“Ɖlate a le kī, ‘Kī ndzi nkpā kī a,
 odi nye odi aake aduli ekpa yī,
 ade odi nye odi aabinya onukpē ɛɛ kī
 yī nye Baguma a.’ ”

XII Foesū boe kame odi nye odi aakpa Baguma ye mɔawe akū akunta.

Tafō Awaē Okristoni Lɛkena Tɔkpa.

XIII Foesū mifō bōfō akū akū kadzemena, kako koto. Fukī miakena nye kī mikena adzuma kī miláakena letsama kī fófō awaē leto ñye fōfō ɛkena tɔkpa. XIV Yī ɔmɔa kakena mɔ boe Ɖlate Yesu sū, nte ndo kī funitsā fudima ne foe akū akū lenyé effī fotsa. Leme nte odi te edo kī funitsā fudi akū tákpale ni, kekō fɔkena effī fotsa fɔkpa ye.

XV Nte nɔ funitsā kī anya sū awaē te kalɔe ni, kekō nné ɔɔo kame ɔtsēmɔ ye. Tafō funitsā a kī anya a lɛwɔla oti a kī ye lolɔ Kristo ku a. XVI Foesū mitafō bati bebā lisupa fotsa a kī mi miakɔna kī fɔnɛɛ a. XVII Kitonekī Baguma legākanya a lenyé kanya mɔ kamɔa, mbom fɔnye tuwī kakena mɔ lukudo, mɔ kawɔle kī Hūhū Kpalɛwa a akpa a. XVIII Ade nte odi asum Kristo ne osi kī akū a, yawo Baguma anɛ ade bati leme akpa ye obu a.

XIX Foesū mifō boe botae enya kī boakena letsa a kī layamena lukudo, titiliwu mɔ fukī fɔabumena akū akū. XX Mitabula Baguma adzuma kade ne funitsā sū. Ne ɔnɔkɔali kame ni, funitsā flee akū kpale fɔkpa kanya, leme fɔnéne kī banya letsa kī laha odi fōfō ɛkena tɔkpa. XXI Letsa wīde nye kī taba sekena ñye ɔmɔa waī

ĩye akena letsa bebã lidima kĩ fófã awaẽ lekena tokpa.

^{XXII} Fõ letsa a kĩ ɔte odo ne fotsa kĩ akũ a, fona ne mimo no Baguma odi kayite. Baguma hila oti a kĩ etáko ye akũ koto ne letsa a kĩ ekena, emo kĩ lenene a sũ. ^{XXIII} Leme nte odi anya letsa kĩ ye owole tákpa ye osi a, Baguma ako ye koto, kitonekĩ letsa a kĩ ekena a táto katekado kame. Letsa nye letsa kĩ oti akena kĩ fotáto katekado kame ní, tokpa tane.

XV

Mifõ Bakena Letsa a Kĩ Laawo Bati Bebã Mbom Anɛ.

^I Kene kĩ boe a kĩ budeĩ ɔsĩ ne katekado kame a, boabumo bati a kĩ be katekado lelá ɔsĩ a ne be ohau kame. Ketáne kĩ boakena letsa a kĩ laawo boe moawe anɛ. ^{II} Mifõ boe kame odi nye odi ekena letsa a kĩ laawo boe bakoba anɛ ayekĩ fóale fokpa be, bitim ne be katekado kame. ^{III} Kitonekĩ Kristo malo tákena fotsa a kĩ fuwo ye anɛ, mbom nde ayekĩ betsele ne Katsɛle Kpalɛwa a kame kĩ, Kristo bi Baguma kĩ, “Fuvũnatsa a kĩ beta bekpa no a, yako ne yĩ akũ.” ^{IV} Ade letsa nye letsa a kĩ betsele biyi ne Katsɛle Kpalɛwa a kame a, betsele foe batsa boe fotsa, kĩ bokoa owole boɛɛ mo Baguma foletsa bodza pintii, budo owole bona letsa a kĩ boadã anɛ a.

^V Baguma a kĩ ye nye owole boɛɛ mo kobẽ kado katokõ a, efõ mina onukpẽ moa ne mi kame, mitomo Kristo Yesu osi a kĩ etsa a, ^{VI} ayekĩ mi flee miákɔa owole moa mo odo moa mimu Baguma, kĩ enye boe ɔlate Yesu Kristo ɔlega a.

Paulo Kɔa Kale Wĩ a Ema Bikĩ Benyé Yudafo a Lemε.

^{VII} Foesũ mite mi bawaẽ nde ayekĩ Kristo te mi a, fɔnya obu fɔkpa Baguma. ^{VIII} Mabi mi kĩ Kristo yakena Yudafo a ɔsumune, ekɔa etsa kĩ Baguma adi ɔnɔkɔali, lɔkɔa ete de ne bohe a kĩ Baguma kɛna mɔ Yudafo bawanyɔ a akũ, ^{IX} ayekĩ bikĩ benyé Yudafo a lemε aamu Baguma ne ye kɔnyakamɔ sũ. Nde ayekĩ Katsɛle Kpalɛwa a le kĩ,

“Ne foesũ maamu nɔ ne bikĩ benyé Yudafo a kame.

Maasã kamu tɔnɔ ndɛla nɔ dĩ ne ode.”

^X Ade bibuki betsele biyi kĩ,

“Mi a kĩ minyé Yudafo a,

mimo kawɔle mɔ Baguma bade a.”

^{XI} Katsɛle bebã le kĩ,

“Mi a kĩ minyé Yudafo a flee mimu boe ɔlate a.

Mi fude fude flee mimu ye!”

^{XII} Ade Yesaya lemε le kĩ,

“Isai kasinu a kame obi odi aane eta,

ye aayanya bikĩ benyé Yudafo a akũ.

Ade ye akũ baakɔa ane bite a.”

^{XIII} Baguma a kĩ ye akũ boate ane a efɔ kawɔle mɔ lukudɔ letε mi kame ne mi ye katekado sũ, ayekĩ mi kɔnete a aakabo ane ne Hũhũ Kpalɛwa kɔbẽ a kame.

Paulo Nye Letsa a Sũ Kĩ Etsɛle Fɔletsã Kĩ a Kayɔ.

^{XIV} Nwaẽ ame, yĩ mɔawe a nte ndo paa kĩ fɔtsa wĩ kakena te mi kamekame, ade minyina kadi pii kĩ míapuli mide akũ akũ. ^{XV} Lemε ne ovoli kĩ kame a, ndo ɔwɔle ntsele fɔtsa fudi faa kĩ mabuki

nkɔa nkai mi foe. Ndo ɔwɔle kitonekĩ Baguma mo yĩ konya ekɔa adzuma kĩ edo yĩ ne awe, ^{XVI} kĩ ìnya Kristo Yesu ɔsumune nkena adzuma nkpa bikĩ benyé Yudafọ a. Nkena adzuma nde ɔsɔfo nkale Baguma Kale Wĩ a, ayekĩ bikĩ benyé Yudafọ a aakena nde afolibɔ wĩ kĩ Hũhũ Kpalɛwa kpale ye akũ ekpa Baguma.

^{XVII} Foesũ yĩ ɔmoa kakena mo Yesu Kristo sũ ni, maapuli mpia ne adzuma a kĩ nkena nkpa Baguma a akũ. ^{XVIII} Letsa a kĩ odi maado ɔwɔle nle nye kĩ Kristo tsã yĩ akũ efɔ bikĩ benyé Yudafọ na osetie ne Baguma foletsa akũ. Ekena fukĩ etsãmena yĩ foletsa a kĩ nle, mo adzuma a kĩ nkena a kame. ^{XIX} Fukĩ ya ne foe kame ne awãwã mo nsentseleni fotsa a kĩ nkena, ne Hũhũ Kpalɛwa a kɔbẽ a kame. Foesũ ntsã mmini nto Yerusalem nnawo Iliriko tite akũ a, nde letsã ne Kristo Kale Wĩ a akũ ntsena temato a flee. ^{XX} Yĩ kawɛ mo ɔsĩ nye kĩ made letsã ne Kale Wĩ a akũ ne awã kĩ bati tánu tɔ Kristo dĩ, ayekĩ nlánake nte ne litekũ kĩ odi nya lotɔ eke a akũ. ^{XXI} Nde ayekĩ Katsɛle Kpalɛwa a le kĩ,

“Bati a kĩ betábi be kadima ne ye akũ tɔ a, aamo ye,
ade bikĩ betánu tɔ kadima ne ye akũ a, aanu foe kayɔ.”

Paulo Kawɛ Kĩ Yanaa Roma.

^{XXII} Ade foesũ nkawɛ lɔkɔ pii kĩ maya ne mi sɛkẽ, mo ntána osi a. ^{XXIII} Leme finyaa kĩ ìyua yĩ adzuma ne fuyite kĩ, mo ayekĩ nkawɛ futeli pii kĩ mayaasela mi a sũ ni, ^{XXIV} mate kado kĩ maapuli nkena foe finyaa. Mawɛ kĩ nte ìyaatẽ

nnaa Spania, maadza ne mi sekē sukuloo budo akū kawole, lokoa mibumena minye yī osi nnaa. **XXV** Finyaa kō ni, manaa Yerusalem nkōa futelitsa fudi mma Baguma bade a ne awā. **XXVI** Kitonekī Makedonia mō Akaia tesōli a te fōtsa faa kī bakōa bibumena ahiāfō a kī bideī ne Baguma bade a kame ne Yerusalem. **XXVII** Be mōawe a adzuni fōane, leme ne onokōali kame ni, be adzuma fōane kī bibumō be. Kitonekī nte bikī benyé Yudafō a na tsefā ne Yudafō hūhū nhila fōtsa a kame ni, kene kī bikī benyé Yudafō a leme akōa be akū kana fōtsa bibumena Yudafō a. **XXVIII** Foesū nte nkena adzuma kī īyua, mō nkōa fōtsa a kī bite a nkpa be ni, maatsā mi sekē ntē nnaa Spania. **XXIX** Īnyina kī nte maya ne mi sekē ni, maakōa Kristo Kale Wī kame nhila baū mma mi.

XXX Nwaē ame, nneε boe Ōlate Yesu Kristo mō Hūhū Kpalēwa a odo kī yakpa a, make mi aduli kī mikena omōa mō yī bobōa mpae mō osī bokpa Baguma ne yī lolō. **XXXI** Mibōa mpae kī enye yī etomena batī a kī betáte bido ne Yudea a awe. Mibōa mpae leme kī yī kasum a kī manaakena ne Yerusalem a kiwo Baguma bade a anε. **XXXII** Nte fōnyε Baguma kawε ni, maaya ne mi sekē mō kawole īyaadzi nweya. **XXXIII** Baguma kī yakpa lukudo a, enamō mi flee. Fōya lomō.

XVI

Paulo Kōa Kawōna Emena Bate Badone Ne Roma a.

¹ Mawe kī mabōa boe owaētsole Foibe kī enye osumune paa ne Kenkrea asōli a kame dī ntsa mi.

II Mite ye ne boe ɔlate a dī akū nde ayekī fofeta Baguma bade a aye. Mikpa ye kabumena kadi nye kadi kī yaasī etomena mi sekē, kitonekī enye bati pii mō yī mōawe malo obumenane.

III Mawōna Priskila mō Akwila kī benye yī bakoba adzuma bakenane ne Yesu Kristo adzuma kame. IV Bekoa be nkpā bewāne yī lolō. Nné yī odi anye be kole, mbom mō tesoli a kī tideī ne bikī benyé Yudafo kame a leme.

V Mawōna asoli bati a kī batsena ne be toto kame a leme. Mawōna yī owene Epaineto kī enya oti ɔtonyade kī ete Kristo edo ne Asia amantam a kame.

VI Mawōna Maria kī ekena adzuma mō ɔsī ekpa mi a.

VII Mawōna Androniko mō Yunia, yī akū bati, kī bomo be bowa kola a. Betē dī ne foto banyane a kame, ade benya yī loto ne Kristo kate kado kame a.

VIII Mawōna Ampila kī mawe kale paa, kī edeī ne omoa kakena kame mō boe ɔlate a. IX Mawōna Urbana leme, boe okoba ne Kristo adzuma a kame, mō yī okoba paa Staki.

X Mawōna Apele kī bemó kī etim ne Kristo kame a. Mawōna Aristobulo toto kame bati a flee.

XI Mawōna yī kade oti Herodion mō Narkiso toto kame bati a kī bekena omoa mō Kristo a. XII Mawōna Trifaina mō Trifosa kī bakena boe ɔlate a adzuma a, mō yī owene Persi kī ekena adzuma paa ekpa boe ɔlate a. XIII Mawōna Rufo kī ete dī ne boe ɔlate adzuma kame a, mō oma kī epi yī nde obi aye a.

XIV Mawõna Asinkrito, Flegon, Herme, Patroba, Herma mo be bawaẽ a kĩ bideĩ ne be sekẽ a.

XV Mawõna Filologo, Yulia, Nerea mo ye owaẽtsole, mo Olipa mo Baguma bade a kĩ bideĩ ne be sekẽ a.

XVI Miwõna akũ mikena atuu ne Kristo odo kame. Kristo tesoli bati a flee awõna mi!

Paulo De Bate Badone Ne Roma a.

XVII Nwaẽ ame, make mi aduli kĩ mifõ mi ane ena ne bati a kĩ bayamena kasẽ, kakaã badi bayela be katekado a akũ. Mivele akũ ne be akũ!

XVIII Kitonekĩ bati a kĩ bakena fukĩnaa bame odu a lásun Kristo, boe Olate a, mbom be moawe lupu basun. Bakoa seme menemene mo fovã foletsa kamu bati, ade baka bati a kĩ binyina tokpa a adzuni a. XIX Leme mi kõ odi nye odi nu ayekĩ miayi ato katse Kale Wĩ a, ne foesũ kawole ade yĩ paa ne mi akũ. Letsa a kĩ mawe nye kĩ minyi kadi ne letsa wĩ kakena kame, leme ne tokpa kakena kame kõ ni, minya bati kpĩ.

XX Owi leláabuna, Baguma a kĩ yakpa lukudo a, aabubuli Satana kpetekpetekpete ne mi aboa kayo. Boe Olate Yesu Kristo emo mi konya.

XXI Timoteo yĩ adzuma kame okoba awõna mi flee. Ade aye a Lukio leme, mo Yason mo Sosipatro kĩ benye yĩ kade bati awõna mi a.

XXII Yĩ Tertio, kĩ ntsele ovoli kĩ nkpa Paulo a, leme mawõna mi ne boe Olate a dĩ akũ.

XXIII Yĩ toto olate Gaio, kĩ ye awã bate badone a atsena a, awõna mi.

Ade Erasto kĩ enye omato kĩ sika okolane mo boe owaẽnyole Kwarto awõna mi papaapa.

XXIV Boe ɔlate Yesu Kristo emɔ mi flee kɔnya. Fɔya lɔmɔ.

Paulo Mu Baguma.

XXV Mifɔ bumu Baguma. Yaapuli edo mi katekado kɔbẽ ne ayekĩ efɔ nde letsã Kale Wĩ a ne Yesu Kristo akũ a, mɔ ayekĩ enye ɔnɔkɔali fɔletsã belawa a kito ane kokɔkɔe a etsa sũ. XXVI Leme finyaa, benye ɔnɔkɔali a na betsa fude flee betsãmena Baguma onukpẽ banyene fɔletsã katsɛle kayi a kame, nde ayekĩ Baguma kĩ edzi nkpã daa hihie eyi a, ayekĩ bati flee aate bido, bekena ne ye ɔledo a akũ. XXVII Baguma a kĩ ye mɔape nye ɔnyansãni a, bɔakpa kamu bɔtsãmena Yesu Kristo akũ kanaa daa daa. Fɔya lɔmɔ.

Baguma Apam Vɔɛ a Tuwuli
Tuwuli: Baguma Apam Vɔɛ a Tuwuli New Testament
copyright © 2008 Wycliffe Bible Translators, Inc.

Language: (Tuwuli)

Contributor: Wycliffe Bible Translators, Inc.

All rights reserved.

2020-12-01

PDF generated using Haiola and XeLaTeX on 21 Feb 2024 from source
files dated 29 Jan 2022

68df0193-2981-5275-8994-8f743fe01e5e